

張文襄公奏議

張文襄公全集卷六十四

奏議六十四

請設施鶴道缺並升鶴峰州爲直隸廳摺

光緒三十年九

月十六日

竊照湖北施南府屬境地本係苗疆界連巴蜀其宜昌府屬鶴峰州亦苗疆舊地遠接湖南均屬民風喬野伏莽繁滋遠距省城一千九百八十餘里聲息每多阻隔而湖北之有教案實自施南府屬之利川縣始利川與四川夔州府屬縣多有接壤夔府教堂素多十六年前利川天主教堂教民卽已不少積案纍纍以後民教之

嫌隙日深教民之蔓延日熾案已斷而復翻讐已解而復結近年施南府屬並有傳耶穌教者於是天主耶穌兩教教士設堂日廣依附日多爭端迭起施郡所屬山深箐密素多會匪匪徒見民教齟齬益復從中煽誘蘊毒愈深地方官政事紛繁於民教涉訟之案未必皆能立時清理甚或袒教抑民含糊了事民情忿無所洩則相率入教以相抵制奸猾之徒陽託教堂以自庇隱通會匪以尋仇伺機竊發隱患方深知府權力既有不足而營汛武員又多與地方民事隔膜呼應不靈防範偶疏衅端立啟近年宜施兩屬會匪教案屢釀巨禍光緒

二十四年至煩兵力勦辦懲創不爲不嚴而愚民罔顧  
後患一朝之忿忘身及親絕不知所儆懼至此次而恩  
施縣屬又出事端幸調派勇營分投彈壓查拏兇犯辦  
理迅速亂事遄已尙未致釀爲厲階懲前毖後若無大  
員前往駐紮督察鎮撫時往各處巡察將所有教案秉  
公剖斷及早消弭誠恐此後地方仍難平靖設使再生  
枝節必致牽動大局斷不能如此次之平妥了結其貽  
患何堪設想然僅派一候補道員無管轄地方之權州  
縣不皆聽命則仍無濟於事臣體察情形反覆籌度必  
須增設實缺道員兼轄文武俾分巡屬境相機調度理

冤釋枉加意拊循使民教調和相安無事嚴辦會匪奸  
宄潛蹤庶足以綏靖邊圉安輯民生查鶴峯州雖隸屬  
宜昌而距施南府城較近僅一百餘里與湖南犬牙相  
錯遇有招解人犯例須由道府勘轉鶴峯距宜昌府已  
四百七十里距荊州道治所更遠至千有餘里公事諸  
多窒礙控馭勢有不及亦宜變通辦理茲擬請於施南  
府城增設兵備道一員並請將鶴峯州升爲直隸廳同  
知由宜昌府屬撥出徑隸該道此項新設之道員卽管  
轄施南一府鶴峯一廳名爲分巡施鶴兵備道並以派  
往施南駐紮之常備軍一營作爲施防營歸該道節制

調遣此道缺應作爲苗疆最要之缺由外揀員請補臣  
此次另摺奏請裁撤湖北督糧道一缺查糧道應領俸  
銀除均攤荒缺外實支銀四十二兩有奇應領養廉銀  
除扣成減平外實支銀三千七百六十兩應請卽以糧  
道原支俸廉作爲施鶴道俸廉並將糧道衙門應支吏  
役工食一併移作施鶴道衙門吏役工食於帑項絲毫  
無所出入而施鶴地方得有監司大員鎮懾其間以時  
巡察撫綏凡吏治教案責令盡心督理防患未然實於  
鄂省大局化俗弭亂之道大有裨益惟施南深僻瘠苦  
創設該道之意自應隨時巡察各屬周歷山鄉方能杜

絕匪蹤消弭教誨屬縣皆係貧瘠其所到之處夫馬供張概令自備斷不准絲毫擾及屬官鄉民是該道辦公所需斷難甚少僅此俸廉之數實有不敷臣當於清查陋規項下酌量核給該道辦公經費以資整飭而免擾累其鶴峯直隸廳之缺亦請作爲苗疆要缺由外揀補其鶴峯州一缺雖改爲直隸廳所有俸廉役食衙署一切可悉仍其舊如蒙俞允分別改設移設應由部頒給湖北分巡施鶴兵備道鶴峯直隸廳同知關防各一顆其鶴峯州州判擬請改爲鶴峯直隸廳經歷駐紮產茶素多之劉駕司以資彈壓鶴峯州訓導擬請改爲鶴峯

直隸廳訓導鶴峯州吏目擬請改爲鶴峯直隸廳司獄其所轄山羊隘巡檢應仍其舊以上各缺請由部一併換給印記以昭信守所有施鶴兵備道暨鶴峯直隸廳同知員缺容俟接准部覆後由臣揀選妥員分別請補仰懇天恩俯念苗疆險遠教案紛繁總求爲地擇人暫勿拘以資格此外經歷司獄等員應否揀員更補另由臣咨部辦理

硃批著照所請該部知道欽此

籌畫東三省事宜摺

光緒三十年九月十六日

竊臣承准軍機大臣字寄光緒三十年六月二十一日



奉上諭朕欽奉 慈禧端佑康頤昭豫莊誠壽恭欽獻  
崇熙皇太后懿旨前因時事方殷需款孔急曾經密諭  
各督撫切實籌辦昨趙爾巽來京召見連日垂詢東三省  
事宜該撫亦以外交兵備財政爲人手要著此事爲  
全球各國所注意實我中國大局安危所關即使事機  
俱順非得數枝勁旅大宗的款極力經營不足以厚聲  
勢而保權利况強鄰交通事變難知更恐有出於意料  
之外者朝廷先事圖維焦思倍切各省疆臣均受國家  
心膂之寄自應同心協力共濟艱危其籌畫東三省一  
切有何深謀至計著該督撫各抒所見具摺密陳以備

采擇至現在庫藏空虛內外同一支絀然事勢迫切練兵籌餉實刻不容緩之時無論如何爲難總當先顧根本著各省通力合作聯爲一氣應如何移緩就急騰挪接濟之處著仍遵前旨一併速籌具奏欽此仰見深宮憂勞豫防危局之至意曷勝欽服伏查東三省自日俄開衅以來日軍雖水陸克捷所向有功而俄軍亦節節拒戰抵禦堅忍究竟將來結局如何此時誠未可豫料大抵奉天一省日軍必須得有險要可資扼守之處方能少息俟攻據鐵嶺後或當暫作停頓休養兵力以待明年再舉極其目光所注兵威所加至於奪據哈爾濱

而止蓋哈爾濱旣得則東西兩條鐵路之樞紐已扼海參崴之援兵已斷日本已可要挾俄人索取兵費矣若必欲盡驅俄軍蹤跡於吉林黑龍江兩省之外則曠日糜費日本之財力旣不能支苦戰傷亡日本之兵力亦將不繼俄旣失哈爾濱勢不能不與日本議和旣與日本和必向我別生枝節以洩其忿而掩其恥或在蒙古新疆一帶肆其窺伺或要素建造恰克圖直達張家口之鐵路皆不可知故我今日之籌畫不宜專注重於東三省而當兼顧蒙古新疆豫爲之備且日本兵力果能至哈爾濱以北俄勢大衰德法兩國深忌黃種之強必

助俄以阻日否則乘機攘取中國土地權利以爲均勢之局此後變態實有難言是我之防俄非備兵不可卽欲稍戢各國乘機均勢之謀亦非備兵不可誠如懿旨必須有數枝勁旅者也若日本則兵力所至必不居佔地之名而兵費則斷無不索償之理非但索開戰後用兵之費又必索罷戰後代守之費以彼勞師糜餉傾國相爭血戰所得之利豈肯徒手以還中國揆諸情理中國亦安能一無所償而向之索地儻日本果能據哈爾濱及海參崴海口自能向俄國索取大宗兵費其向我索取代收代守之兵費當可少減若日本兵力所到不

能脅俄使出兵費則必全數向中國索償爲數尤不可思議是我與日本非償費不可誠如懿旨必須有大宗的款者也綜是二者中國今日無論如何總以籌款爲第一要義但籌款不能專供練兵之用而當豫爲償費之地顧日本兵費之鉅必以數十百兆計中國此時財力萬萬無從籌措除量力助給外或者於彼兵力所到之地許以森林鑛產魚鹽最優之利益以爲抵扣至遼東鐵路之利益中國地主亦應有分並可將鐵路利益抵扣若干則我但籌自養遼地彈壓兵護路兵之餉而不須籌代養日本駐兵之餉即使酌量籌助亦不必甚

多至日本既留兵代守遼東之境則我止須備兵以防遼西之境兵數卽無須過多誠以兵易練而將難求舊日行伍出身之將弁姑不具論卽近年派赴日本學習武備之員其學問不過士官而止其閱歷不過中隊極之大隊而止至於陸軍大學之研究大隊聯隊以上之指揮皆非所素習以與他國之將領相較去之遠甚將材之不足當在聖明昭鑒之中有兵無將雖多亦奚以爲故臣愚以爲目前練兵實有不宜過多者多練兵不如多留款萬一俄人窺我蒙古日本既留兵駐守奉省則熱河一帶日本必不願鄰氛逼其藩籬我誠能資以

餉力則自張家口以東有警即可借助於日本以禦之以日本之將校率我之兵庶幾可與俄人一戰俄人窺我新疆地近印藏權利所關必爲英人所深忌我誠能與之連衡則自甯夏以西有警即可借助於英以禦之其以英將率我兵亦然雖非上策猶爲得半之道蓋東聯日西聯英雖兩國必欲要索利益然總遠勝於俄國之信義全無公然吞噬者我果與英日聯盟俄患必可無憂京畿根本旣安然後可徐議應付德法諸國耳惟是各省籌款之法早已智盡能索羅掘一空仰惟宵旰焦勞之意又安敢不勉爲其難臣前已遵旨認籌的款

五十三萬兩以供京師練兵之用此款自當於年內掃數解清茲擬再行竭力增籌的款以備將來遼東償費之需而鄂省舉行要政用度浩繁本省所籌餉項各有抵支本已入不敷出故前次認籌之款係聲明在銅幣盈餘項下騰挪勻撥實已竭盡無餘此次再四通籌別無可指之款萬不得已計惟有添購機器加鑄銅元得有餘利或尙可稍資挹注擬從光緒三十一年起鄂省再認籌的款五十萬兩分批解京備充遼東償費其餘藉以彌補鄂省增兵製械興學籌防各項不敷之用體察情形各省現均趕鑄銅元勢必銅價日昂錢價日低



餘利必漸減少然四五年內銅幣銷流尙不致遽形壅滯其利雖薄尙可有盈姑俟五年以後再行另籌抵補之法此時舍鑄造銅元委屬無可設法綜計鄂省於常年額解增撥各款及支應本省種種要需外茲復兩次認籌的款一百餘萬兩之多勉竭涓埃當邀聖慈垂鑒至各省應如何通力合作移緩就急之處應候宸斷施行

旨留中欽此

請暫停道府分發摺

光緒三十年十一月初二日

竊照培養民生綜核財用其源均在於澄敘官方近歲

以來以順直秦晉等省賑捐減成報捐實官者益多仕途猥雜較前尤甚而道府一班亦遂接踵紛來無所底止查湖北省從前候補道員不過十餘人候補知府亦不足二十人現在候補道員多至四十三人候補知府多至五十人人多事少已苦委用無期近日官場風氣每不能儉約自甘武昌省城公館占盡人已無屋可租店租物價無不昂貴既列道府之階用度益多情形益窘假令此輩各勤本業不遽捐官或不捐品級較崇之官其窘累情形尙可不至如此近奉諭旨飭令各省裁併局所沙汰冗員此曹益無聊賴其守分者耐苦閒居

不免銷磨志氣其熱中者徒思奔競尤足敗壞官常其未得差也則多方以求錄用其既得差也則又多方以求加薪且加薪猶以爲未足必得優差要差而後已夫既專以營謀優差要差爲務則得差之後必然逞其蠹國病民之技可想而知不遂所欲則怨望立生造作謠言顛倒黑白阻撓要政肆意矯誣若此之流往往而有此後若再紛至沓來不惟差缺益形壅滯且出位妄想無事生風馴致通省官場盡染惡習流弊尤不可勝言此乃近來惡習鉅弊爲十年以前候補官之所未有者也夫道員居監司之列知府爲表率之官本非無學問

無閱歷無資格之員所堪濫厠嗣後除同通州縣以下各官仍照常辦理外擬請旨敕下吏部凡分發及捐納道府人員無論指省掣籤准將湖北省停止分發二年以冀稍清冗濫藉挽澆風實於鄂省吏治大有裨益殊批吏部議奏欽此

請旌孝子摺

光緒三十年十一月十六日

竊據湖北武昌府知府梁鼎棻詳准補用知府蔡琦等文稱湖北分缺先用典史方炳垣原籍福建閩縣由監生報捐典史指分湖北同治十三年九月到省迎養其母在鄂寓居省城紅牆巷地方光緒二十九年十月二

十日家人失慎寓宅被焚方其初起之時始覺之際火光迸裂未至四面延燒僕婢奔呼不難一身獨出而方炳垣惟知有母不復顧身迴旋叩關負舁出室不虞火勢猛撲烈焰環攻正梁旣傾前楹並墮母子環抱骨肉俱灰同櫻嘻出之災甘蹈鬱攸之禍報親恩於罔極遑恤焚身悲天道之難知皆爲酸鼻該員等屬在寅僚誼兼桑梓咸感至行願表遺芬理合開具事實清冊出具印結送請查照轉詳等情由府加具印結詳請奏懇旌表前來臣伏查該孝子方炳垣素履克修白華致絜微官奉母方懷毛義之心大節殉身遠比介推之烈倉皇

問寢慘酷焚巢念劬勞而舍命不渝資矜式而盡倫無  
忝允稱孝行宜荷旌揚合無仰懇天恩俯准將孝子方  
炳垣給予旌表出自鴻慈謹會同湖北學政臣李家駒  
恭摺具奏伏祈聖鑒

硃批著照所請禮部知道欽此

恭報兼管湖北巡撫事日期摺

光緒三十年十二月二十一日

光緒三十年十一月先後准政務處吏部咨開會同議  
覆雲南巡撫林紹年奏請裁撫缺一摺於十一月初六  
日具奏奉上諭政務處吏部會議林紹年奏督撫同城  
事權不一請裁巡撫一摺雲南湖北巡撫兩缺著卽行

裁撤湖廣總督雲貴總督均著兼管巡撫事餘依議欽此咨行前來臣遵於十二月十九日恭設香案望闕叩頭謝恩卽於是日遵旨兼管湖北巡撫事臣竊惟向來督撫同城者除舊例歸入題本公事係各歸各衙門辦理此外地方重要事件皆係公同商辦誠以安民講武內治外交其利病大率相因其措施必須通貫今仰奉明旨令督臣兼管巡撫任寄旣專責成尤重聞命之下兢悚滋深臣惟有一秉虛公倍加勤慎督率司道等將地方應辦事宜文武兼綜兵食通籌以仰副朝廷因時建官之至意

硃批知道了欽此

進呈銀幣式樣片

光緒三十年十二月二十一日

再臣於本年八月十六日附奏請就湖北鑄造庫平一兩重銀幣無論收發皆照湖北藩庫平核算出入均作爲十成紋銀名曰大清銀幣先行試用以覘商情民情兼體察各國商人情形出納利弊行之而通則請戶部裁酌推行利在全國行之而不通則湖北當收回另鑄所有賠耗工火傾鎔之費湖北任之從此可知中國貨幣輕重之所宜以及改換收發之難易利病昭然可有定論等情欽奉硃批著照所請該衙門知道欽此當卽



欽遵飭局妥慎辦理竊維銀幣之行類若畫一利國便民獨不便於胥吏鑪坊之輩其造言搖惑設計阻撓勢必無所不至局外持論者未經細心體察輒不免辯難多端或謂既鑄此項銀幣應卽禁阻墨西哥銀元不准行用不知向來部庫及外省司道關各庫從未收兌墨元而民間顧流行日廣者以各省通商口岸租界外國銀行林立其與華商交易往來多以墨元爲便故也此時中國之權力斷不能強使外國銀行之不用墨元卽不能明禁中國商民之參用墨元將來中國自鑄一兩銀幣日漸充盈爲中國商民所信用則墨元將漸次銷

廢不禁而自絕故此時改鑄一兩銀幣者正爲他日禁阻墨元之地或又謂國幣旣以一兩爲準則舊日各省所鑄七錢二分之銀元當盡數收回另鑄不知舊鑄銀元雖重庫平七錢二分而民間折算生銀係隨市價漲落僅作庫平六錢數分不等與此次新鑄銀幣收發皆作庫平十成足銀用者判然不同試辦之初旣不能驟廢生銀不用則舊鑄銀元亦祇列作一種生銀儘可聽民之便與新鑄十成之銀幣行用各不相妨此後鄂省官局自無再鑄七錢二分之理至久已散在民間者自無庸收回另鑄以省紛擾或又謂新鑄銀幣旣名爲國

幣則但當以元計不當仍以兩計不知國家一切賦稅皆以兩錢分釐計算則銀幣之爲兩爲錢豈可不明著其文以杜胥吏之意爲輕重免致商民之折耗喫虧或又謂一兩銀幣當明言值制錢若干以昭畫一不知各省銀錢兌換之價到處不同斷非湖北一省之所能獨定儻使戶部能定庫平足紋一兩值制錢若干通行各省收發皆歸一律不准稍有參差則此項一兩銀幣自有定價其權固操諸戶部者也總之臣此次奏請試行一兩銀幣原爲體驗官民行用情形是否稱便以爲戶部裁酌推行地步鑄數斷不能多一俟戶部開鑄其數

足以供各省之用湖北儘可停鑄且湖北所鑄銀幣聲明除工本火耗外所有盈餘悉數報解戶部於戶部財政處權力未嘗絲毫有所侵損一切辦法皆再三審量而後定試行數月之後其利弊不難考見果有窒礙自當立予變通此時新幣方行設有阻撓搖惑之詞上瀆宸聰應懇乾斷主持暫置勿議茲已飭局將一兩銀幣鑄成發交湖北官錢局先行試用體察商情輿論似尙無所疑難應俟試行三箇月後察看銷數是否暢旺咨報戶部財政處藉資考核除通行司道關局暨全省府廳州縣無論何項賦課稅捐一律均照庫平足銀收解

不准稍有抑勒以昭大信外謹先將鑄成銀幣式樣十枚裝成一匣恭呈御覽

硃批財政處戶部知道欽此

清理衛田原章不便另籌簡易辦法摺

光緒三十一年三月

二十一日

竊照湖北省於光緒二十八年遵旨裁撤衛官清查屯田當經專設清理衛田局遴委候補道朱滋澤會同藩司糧道酌擬辦法詳請比照民田分別上中下等則按照奏定新章完稅六分凡田價每畝值二十千以外者均照二十五千文之價酌繳契稅錢一千五百文每畝

值十千文以外者均照十五千文之價酌繳契稅錢九  
百文每畝值十千文以內者均照十千文之價酌繳契  
稅錢六百文又每錢一千文另繳清丈費二十文派員  
分赴各屬會同地方官將所有屯田親履勘丈飭令各  
屯戶將應完契稅分三限繳清以六箇月爲一限繳稅  
後給予印契准其永遠管業查核所擬辦法較言官條  
陳原議令按畝追繳田價五兩者已屬大爲輕減經前  
湖北撫臣端方批准於是年九月二十八日會同臣具  
奏欽奉硃批戶部知道欽此嗣准部咨以湖北所定上  
中下三則田價較山東爲輕奏令仿照山東繳價數目

變通辦理復經前撫臣飭據司局議詳酌增上則田價  
每畝值二十五千文以外者照三十千文之價完稅續  
經奏咨通行在案計自開辦以來歷今兩載有餘各州  
縣衛田尙未能一律辦竣卽已冊報認稅之各州縣屯  
戶遵限完稅者甚屬寥寥推原其故良由向來田房稅  
契皆出自置產之家其家力能置產必係目前景況充  
裕積有現錢其措繳應完契稅自屬非難今屯戶承種  
衛田皆由世業相傳或歷四五百年或歷二三百非  
以餘財新置卽其間轉相頂替亦多在百年內外民戶  
以實價典來亦早視同恒產一旦責以按田繳稅未必

家有餘資加以湖北田土山澤相間罕有大片膏腴農業歲息甚薄假如八口之家有田二十畝餬口尙虞不足若照上則田價驟令完稅至二十餘千文之多斷然無從措辦且衛田沿自前明當時興屯之初皆以荒蕪無主之地招人承種故畝數弓丈概從寬計每田一畝有較民田多至加倍者相沿旣久習爲固然今概欲以部尺二百四十弓爲畝令將溢出之田按畝報稅業戶失其固有尤爲強以所難臣於光緒二十八年十月初奉命調署兩江旋即入京陛見甫於上年二月回任旋赴江南會議製造局移廠事務離鄂已將及兩年四月



回鄂後詢及衛田一事尙無眉目局用糜耗已鉅而契稅收繳者寥寥悉心體察查知各州縣印委於查勘衛田時多因眾情疑沮不肯報丈慮或操切生事率與通融照冊按糧攤算畝數皆係約計其實在按畝清丈界限分明者甚屬有限其所定上中下田價等則各屬各辦寬嚴不等多寡輕重之間相較多未能一律以致各屯戶藉口觀望距省較遠之州縣多有未經開丈者卽已報丈畢之處屯戶亦以無力繳稅任催罔應卽如宜城縣屯戶滋事一案亦因求減衛稅而起是原定辦法雖已從寬於羣情仍多不便若不量予變通力求簡易

將衛田永無清理之日契稅永無完繳之期徒有估價  
認稅之虛名並無利國便民之實際臣督同司道暨承  
辦衛田各員再三討論體訪羣情深知衛田年遠輻輳  
屯戶貧苦居多亟應另籌簡易辦法俾各屯戶易知易  
從力無弗及庶足安眾心而收實效謹將改訂新章八  
條臚陳如左

一衛田畝數屯戶向祇知按冊完糧以斗石計數但知  
自己田地界址四至並不知按照官尺應合若干畝是  
以各屬清理衛田率多按糧攤算其實行勘丈之處無  
多至今遷延不丈不報者尙十數州縣承辦各印委寬

嚴不等或報有缺額或報有溢額辦法本未一律其查報溢額者屯戶多以今昔弓丈不同或指認不確紛紛稟求寬減另丈且開丈已及三年其報明丈畢者亦並未遵章繳稅至丈有缺額者則並無辦法是所謂缺額者固未可憑卽所謂溢額者亦未足據茲飭各州縣一律將衛田畝數按照原糧原額均勻攤算另行造冊呈核既無所謂溢額卽無所謂缺額庶足以息疑懼而免參差

一衛田原定田價數在二十五千以上者列作上則數在十五千以上者列作中則數在十千文以內者列作

下則現經派員詳查各屬原稟所定等則皆係屯戶約略承認印委通融稟報並非確經履勘據田分等是原稟等則高下全不足據徒致名目紛擾今應將原契上中下等則概行刪除按照司道兩庫額徵正雜各款無論或完銀或以米完折色每完銀一兩計上田約合二十餘畝中田約合三十餘畝下田約合六十餘畝均令酌繳契稅及局費錢八千文此外不准書差多取分文

一原章稅費分三限完繳每限半年爲期較迫恐屯戶力有未逮今准將此項應完契稅局費自本年起的分作

三年繳清每年仍分上下忙兩次徵收以示體恤

一錢糧每銀一兩或向係完銀若干或向係折徵錢若干均照該衛向完之數完納不照民糧章程以省紛更惟其田分隸坐落之州縣作爲民糧徵收

一衛田向有之冊費編審費一切雜項暨公幫置產及軍頭等名目永遠革除以清擾累

一向有閑丁一項厯係循照舊日冊名派令無田之戶認完今應查明全行豁除催糧書差不准朦混再徵違者准其控告治罪

一各州縣已收衛田稅費照現改新章多收准其留抵

本戶今年明年正項錢糧以昭公允

一賠款改學堂捐民田均須輪納屯戶子弟不乏讀書入學之人是學堂捐一項衛田各戶不應置身事外俟契稅繳清後應如何與民田一律輪納自當由該處紳士公同酌議稟由地方官詳請核定

以上八條係爲體恤屯困刪省虛文起見通省衛田一律辦理毫無偏枯旣將稅數減少又將期限展寬完稅自不爲難庶徵收可期踴躍經此次改章寬恤之後儻各屯戶尙敢抗違觀望應飭地方官按戶查追從嚴懲辦現已由臣出示曉諭行司通飭各州縣一體遵辦惟

有仰懇天恩俯念湖北省衛田屯戶情形困苦准予照議施行以廣皇仁而收實效

硃批戶部知道欽此

查明周馥參款摺

光緒三十一年八月二十九日

竊臣承准軍機大臣字寄光緒三十一年四月二十六日奉上諭有人奏署兩江總督周馥內政外交不能勝任等語著張之洞按照所參各節確切查明據實具奏毋稍徇隱原摺著鈔給閱看將此諭令知之欽此當卽欽遵照錄原奏遴委道府各員分赴江甯海州及山東地方按照所參各節明查暗訪務得確情去後茲據先

後回省稟覆前來臣復詳加訪察證以人言謹將確實情形爲我 皇太后 皇上臚陳之一原奏稱江南師範陸師學堂久經開辦規模程度應有可觀該督意爲更張致激生徒大半散去等語查江南陸師學堂開辦以來向係延聘德員充當教習學級分陸軍正科及普通科兩班德員特屯和恩由自強軍調充該學堂教員已歷年所三十年十一月添聘德員璞斯瑪充當教員訂立合同三年惟聞特屯和恩現在教練未能盡合新法璞斯瑪又係曾充金陵關辦事員於武備本非專門之學眾學生不甚悅服加以留學日本學生先後畢業



回甯多向學生盛稱日本兵操之美本年二月二十三日該學堂普通科全班學生連發三次電話催總辦道員羅長禱卽刻到堂環向該總辦逼迫請改日操羅長禱不能體察該學堂兩教員不盡得力但以須俟練兵處頒發操典到後始能議改爲詞學生等見所求不允不過空言推宕遂相率不上講堂該道羅長禱卽於次日據情稟請撤差經該署督批該學堂學生聚眾停課挾制改章此風斷不可長飭派道員俞明震確查嚴辦旋將羅長禱調差卽委俞明震接充該學堂總辦嗣因俞明震查得羅長禱調差之後有學生朱士琦任熙兩

人在三牌樓地方與提調候補知縣黃曷隆路遇向其  
滋鬧勢將用武因牌示學生請改日操尙無不合惟不  
應向提調滋鬧卽將學生朱士琦任熙二名斥革乃該  
學生等違抗不遵竟於是日全班開散搬出學堂經俞  
明震稟明該署督飭將爲首之張元輔吳萬鵬毛志明  
等數名提至督署傳問究辦此外學生之同到督署者  
有三四十人之多該署督略加申斥卽交藩司帶回發  
落取具悔過甘結不准再入他學堂肄業其普通一科  
另招新生一百名派遊學日本畢業生數人充陸軍速  
成中隊長及分充區長改習日操其原聘之德教習則

專授講堂功課其事乃定是此次陸師學堂學生藉口改操全班退學意在聚眾把持並敢向提調尋毆尤爲凶悖近日狂妄滋事之徒名此等事曰結團體又名曰學生權令之則不遵開除之則又滋鬧實屬近年學堂惡習大背武學服從之義該署督另招新生改習日操其舊生不准再入他學堂肄業實是學堂正經辦法並非該署督意爲紛更致激生徒散去也至三江師範學堂學生偶因細故與總辦爭抗間亦有之尙無散去學生之事惟本年二月該署督飭改鳳池尊經兩校士館爲師範傳習所卽以向來肄業之生童充之該生童向

不住館或以訓蒙爲業或仰膏火贍家恐取入傳習所  
後功課既繁又兼失去膏火不無舛望遂藉口所定功  
課鐘點太多於署督親臨考試點名時大眾將首先應  
名接卷之兩生拖下不准應點一闕而散旋由學務處  
另議章程暫就貢院開辦先取特班學生四十名正班  
學生四十名均每人每月給膏火銀三兩另取旁聽學  
生四十名不給膏火其未經考取之年老生童仍准照  
舊應課生徒遂各相安原奏所指之師範學堂當卽師  
範傳習所之誤一原奏稱各處釐金向屬藩司專政該  
督以皖人主之札行藩司無庸會銜州縣委署牌示首

書奉督憲諭不知是何體制等語查江南釐捐局向有道員總辦遇有用人改章重要之事該局總辦亦能徑稟督臣定議辦理並非盡由藩司專政惟關防向存藩署故局總遇事須與藩司商明大約藩司與局總分操其權固有和衷商榷之益亦有牽掣瞻顧之損上年十二月該署督札行釐局內開江蘇候補道陳維彥前在貴州辦理釐捐頗著成效委令總辦金陵釐捐局時須攜帶關防周歷巡查藩司政務殷繁不能兼顧應將關防移交陳維彥收存隨時開用藩司不必會銜遇有重大事件仍會同藩司具詳請示等語查陳維彥係安徽

石埭縣人遂有皖人主之之說臣訪查陳維彥之爲人素稱端謹曾有改裝扮作商人查出釐局弊端之事是其人辦事尙係精細認真一流不得謂該署督任用之非惟此外大小局差所委皖人頗多在該署督當係擇能而使然眾官不免嘖有煩言至委署州縣懸牌一節經臣飭據江甯藩司黃建筦稟復該司懸牌並未書有奉督憲諭字樣外間訪查亦未見過此等牌示惟訪諸輿論僉謂藩司開摺所擬之員多未委用而委用者藩司未必皆加贊成卽如調補江甯縣知縣葉保慶外間謂其專工應酬現署山陽縣知縣單琳外間謂其聲名

平常議論繁興實由於此一原奏稱該督之子以江蘇道員迴避入署用事擅權本年正月有道員曾廣祚賄買大通督銷局差文案知縣洪壽彭串通家丁張貴及充釐金司事之秦克昌彭雲蔚等從中說合委札已經用印因過付口角闔署喧傳周道洪令始懼自行舉發該督知其委折因授意兵備參謀處道員拘訊張秦彭三人威嚇祇認招搖遽殺秦克昌以滅口詢其罪名則云以游勇正法又改秦姓爲岑以錮覆盆之冤等語查已革江蘇候補道曾廣祚原充上海文報局差上年十二月間因公回省適有兩江督署衛隊親兵岑盛昌卽

岑克昌曾在督署文案委員洪壽彭處服役與素識之彭雲蔚在外招搖撞騙偶在煙館會遇曾充曾廣祚處司事之鍾連生談及洪壽彭可以代人關說差使鍾連生告知曾廣祚慫恿謀幹大通督銷局差曾廣祚爲其所愚聽鍾連生等代爲說合鍾連生因往晤岑克昌彭雲蔚託其謀畫此事岑克昌謂須回署與同事張貴商辦並囑令曾廣祚往拜洪壽彭曾廣祚遂卽往拜洪壽彭兩次第二次洪壽彭延入接見嗣又往曾廣祚寓所答拜一次鍾連生因託彭雲蔚轉詢岑克昌須費幾何岑克昌回稱據張貴說要銀一萬八千兩後來曾廣祚



如數寫給期票由彭雲蔚轉交岑克昌說上頭定要現銀將期票退還彭雲蔚掉換數次曾廣祚以委札未下不允付給現銀彼此相持至本年正月十四日曾廣祚復往督署請見洪壽彭洪壽彭拒未見面曾廣祚心中焦燥當將洪壽彭家丁張貴喚出追問此事究竟事遂張揚旋由洪壽彭稟請該署督查辦奉批飭將岑克昌彭雲蔚張貴發交上元縣管押派委兵備參謀處道員朱恩紱徐紹楨會同提訊鍾連生聞風遠颺飭拏未獲訊據岑克昌彭雲蔚供認前情不諱張貴供不知情據彭雲蔚供亦謂與張貴並不認識稟經該署督批飭岑

克昌以革勇造謠詐贓卽照軍法處斬彭雲蔚誑騙說  
合發縣永遠監禁張貴取保開釋現查彭雲蔚已於六  
月內在監瘐斃飭據兩江兵備參謀處道員朱恩綬徐  
紹楨稟復稱堂訊時各犯均無供涉該署督之子周學  
海指使情事該犯岑克昌實係岑姓並非改秦爲岑向  
在衛隊當兵亦非釐金司事以上均按照原奏所參內  
政各款分別查明之實在情形也一原奏稱該督前任  
山東巡撫時一惟德人之言是聽膠澳租界原國家不  
得已之舉乃由膠濟鐵路而兼營浦濟由鑛權利益而  
漸奪政權原約所訂鑛山之利在鐵路相近十英里內

繼又欲禁華人開采在開鑛之處五英里內豈不知鑛  
穴漸移省界立盡愚莫甚焉等語查膠澳租約係光緒  
二十四年十二月由總理衙門在京與德使所定其第  
二端第一款內有由濟南府往山東界之一道應俟鐵  
路造至濟南府後始可開造以便再商與中國自辦幹  
路相接等語既有此議故德人有自濟南查勘至兗州  
府嶧縣等處界內測量路綫並插標記之事雖尙無兼  
營浦濟明文然約記許其商與中國幹路相接則將來  
接造鐵路抵至何處實不能測其所至又德人上年十  
二月意欲續立開鑛章程四款其第三款云德人鑛廠

十五里內華人已開者須卽停止未開者不得續開等語經前署山東撫臣胡廷幹飭由司局面復謂華礦驗明與公司實有危險則華礦亦必有危險應於兩礦適中之處畫一界綫於界綫兩旁各讓二里共爲四里作爲鑛界公地彼此立清界石無論地上地下華商與公司皆不得繞越開挖以免危險等語德人接此信後未再辯論至今續約未定此兩款皆非該署督在山東巡撫任內之事至所云由鑛權利益而漸奪政權並未指明何年何事無從查悉一原奏稱原約本有華商合辦一層乃鑛產禁用機器火車賤待華人其總辦錫樂巴

玩大吏如嬰兒該督反受其寶星之賞恥莫大焉等語查山東鑛務章程係光緒二十六年二月由升任山東撫臣袁世凱會同幫辦山東交涉總理路鑛事宜副都統蔭昌與德人鑛務公司總辦米海里所定本無禁阻華人用機器開鑛之說上年十二月德人續擬鑛章四款其第二款華人准在三十里內至今未辦之鑛用土法照向來之大小續辦不許用機器等語經前署山東撫臣胡廷幹飭司局議駁未准德人亦未再辯論此事關係甚大幸未允許德人之請亦與該署督無涉至火車賤待華人此乃下等粗躁西人之積習誠所難免該

署督在山東巡撫任內有長山縣知縣曹姓之家丁被  
火車站人毆辱該縣商民站長將喝令逞凶之人嚴懲  
該公司欲將曹姓撤任該署督始終未允是該署督尙  
不至惟德人之言是聽卽此可見至收受寶星一節係  
因膠濟鐵路工竣德國以該署督保護鐵路之功酬贈  
頭等寶星該署督奏明奉旨准其收受此乃各國交際  
之常例並無不合一原奏稱及署兩江總督卽欲德員  
辦理製造局及陸師學堂因其要索操場擅以城內獅  
子山下地畀之德人引綫作圍擬將山上礮臺圈入以  
守土之疆臣輒以要地予人若非別有原因何至如是

等語查上海製造局原設有船廠船塢爲修理官商輪船之用本年二月間經該署督會同北洋大臣袁世凱奏派廣東水師提督葉祖珪總統南洋海軍並將上海製造局內船廠撥歸葉祖珪辦理由葉祖珪稟請飭派德員巴斯管理船廠之事該德員久在北洋當差此次係由北洋調來自係出自葉祖珪之意原奏所謂德人辦理製造局當卽指此至金陵陸師學堂向係聘用德員教授功課歷有年所惟此次續聘之德員璞斯瑪曾充金陵關辦事員於武學非其專長致不爲學生所敬服則事所難免至獅子山操場一案查光緒三十年三

月間駐甯美領事官曾向金陵洋務局商借此地爲美兵輪兵丁打球體操之用洋務局當將未便情形派員面復美領事據美領事言西曆二月間德兵輪已經借操何獨不允美國洋務局當向總臺官王世綬查詢前事始據稱前次德兵結伴閒游路過該操場相與在場拋球作戲片刻卽散並未先來商借等語乃此次美領事因洋務局未允借地卽私向總臺官王世綬商借該處操場王世綬允以每禮拜六均可借用嗣經前督臣魏光燾查知飭令不准借用操場王世綬始向美領事婉言商阻美領事亦卽允從此係上年魏光燾任內之



事本年二月間英國兵輪船主塗雄飛謁見該署督面  
請借地爲水師兵丁上岸打球之用經該署督函飭金  
陵關道及洋務局在城外下關通商場金陵關基地左  
近原備作巡捕房之空地一區圍以竹籬建造門亭暫  
行借給各國兵輪作爲公共體操場之用英領事初尙  
以該兵船主塗雄飛所借係指獅子山山下操場而言託  
金陵關稅務司再申前說復經洋務局金陵關道一再  
函駁並告以下關之地已向塗雄飛說明彼此允願英  
領事始無異言是擅以獅子山下操場私允借給外人  
乃係上年總臺官王世綬之事本年該署督因不允借

給獅子山下之地始允以下關附近空地借給各國兵輪暫作體操場之用民間未能深悉其中曲折以訛傳訛實由於此一原奏稱德人近復暗規青口水兵上岸升礮豎旗以測量沙綫爲名發端嘗試又稱鹽場爲國家命脈近又有通海通贛兩處墾牧公司尤宜善爲鎮懾以保利源斷非該督之所能勝任各等語經臣所派委員馳赴海州檢查案卷本年三月下旬有德國兵輪駛赴海州鶯游門外游弋旋至東連島上岸在汪姓菜地內支棚住宿旋至桅尖山頂豎旗一面隨即展輪而去經海州知州王曜接據該處董事公稟有升礮豎旗

逼遷居民情事電稟該署督派員前往查勘並電詢德國駐膠總督查明禁止據膠督電復謂實係兵船習練測度事宜毫無別故至所留標旗應否拔去請由貴大臣任便飭令海州辦理可也等語並據查勘委員會同海州知州稟復查詢居民德兵上岸時尙無鳴礮之事間有居民驚疑遷避亦尙無被德兵逼遷之事隨將德兵船所豎標旗撤下改懸龍旗民心現已安靖等情各在卷茲復經委員詢據該處士民聲稱當時突來洋兵三十餘人上岸攜有小礮洋槍在汪姓菜地內支搭棚帳住宿民情甚爲惶擾相率避入雲台山中遠遠聞有

礮聲等語核與江南印委查復情形大致相合其豎旗時曾否鳴礮居民亦不能指實惟現已將德旗撤去改懸龍旗德兵輪去後亦未再來游弋現與該處鹽場及墾牧公司尙無干涉此後自應妥籌防維之策前事似可無庸深究一原奏稱該督終日往返下關迎送洋員教士饋以酒食卑瑣難堪實傷大體等語查國際之與私交本判兩途中國所謂交涉卽外國所謂國際國際交涉之事不容稍有假借至私交酬酢之禮不妨略予周旋訪聞該署督雖時赴下關答拜各國領事兵官間有饋遺然於教士來甯實未聞有迎送饋遺之事以上

均按照原奏所參外交各款分別查明之實在情形也臣查署兩江總督本任山東巡撫臣周馥老成幹練力果才優勤勞過人銳意求治此次被參內政外交各款現經按款查明除該署督辦理本無不合及傳聞失實暨事在前任與該署督無涉者均可無庸置議外其關繫重要者惟在岑克昌詐騙正法一案及借與外國水師操場一事茲經查明該署督所借給外人者係在城外通商場附近空地與城內獅子山礮臺尙無干涉且聲明只係體操限定不得過三四十人原奏係屬訛傳且其地原係備建巡捕房之基址今已定議卽日興

造捕房是此項借給體操之地已經化爲烏有更可勿庸置議其於岑克昌招搖詐騙一案於事發訊供後立將衛隊親兵岑克昌正法候補道曾廣祚參革查江蘇近年官場習氣實爲惡劣賄買差缺營求撞騙之事時有所聞該署督承積弊之後嚴刑重典能令匪徒震悚洵足以挽救頽風特因其未將全案情形據實陳明致滋口實惟該署督內署既無弊端應請免其置議該署督之子江蘇候補道周學海到省有年又久居揚州與官場候補人員往來熟識者較多此次因迴避呈請改省未及赴部聽候改掣省分仍留侍該署督署中以致

委差委缺遂爲招搖撞騙之徒憑空指託似屬非宜應由部改掣省分迅速飭令領照到省免滋謠誣至該員洪壽彭身充督署文案應如何嚴密關防乃與素不相識之在省候補道延接周旋並往答拜致被曾供役使之岑克昌等句串招搖物議紛騰致釀二命實屬不知遠嫌釀命生事應請旨將補用直隸州直隸候補知縣洪壽彭交部嚴加議處獅子山礮臺外控長江內瞰全城乃金陵防守第一關鍵官民婦孺無不知之况臺下操場乃登山上臺之路咽喉所在各國礮臺界內從無准外人闖入之例乃江南總礮臺官江蘇候補直隸州

知州王世綬於職守所在全城安危所關擅將城內獅子山礮臺下操場初次私自借與德兵輪水勇拋球作戲續又私允美領事謂每禮拜六該操場均可借用事後雖經魏光燾查知飭禁而該員之膽大妄爲實出情理之外應請旨將江蘇候補直隸州知州王世綬卽行革職永不敘用江蘇候補道羅長禔委辦陸師學堂於軍學要務並不考核教員力求實效徒事敷衍推宕以致激生事端亦屬辦理不善應請旨將江蘇候補道羅長禔交部議處又查現充三江師範學堂總辦江蘇候補道李光業係由佐雜過班並非正途出身難孚物望



三江師範關係重要應請敕下該署督臣另委學識優長諳習學堂事務之員講求整頓以重教育而端表率至委差委缺之得失惟視其是否公允並不繫乎司局何人主持亦不繫乎籍貫是否同鄉兩司所舉之員豈盡賢能並無必須照用之理然督撫所指用之人若經兩司極力勸阻則必係確有不妥亦宜詳察另委以杜偏執誤事之端上官同鄉之員未必不可任用然若非有過人之才具異常之勞績則宜旁蒐博采不宜偏重一省人員以彰公溥無私之道竊惟集思廣益往哲良規立賢無方古經明訓總以委用之人才守勞績有無

可取爲斷相應請旨敕下該署督臣督率司局於補署各缺及委辦釐金等局差大小各員虛心遴選秉公考核不限方隅不存成見以才守之長短爲進退之準繩自然人才爭奮眾論咸孚矣至調補江甯縣知縣葉保慶現署山陽縣知縣單琳應請敕下該署督臣切實察看於地方是否相宜自行奏明辦理以重吏治所有遵旨確切查明兩江督臣被參各款謹據實覆陳再此案因赴山東省內外及海州等處詳查端緒紛繁是以覆奏稍遲合併陳明、  
硃批另有旨欽此

張文襄公全集卷六十四終

新城王樹森校

張文襄公全集卷六十五

奏議六十五

裁撤釐金局卡試辦統捐摺

光緒三十一年八月三十日

竊惟釐捐之設所以養兵衛民本國家萬不得已之政且近年地方新政義舉亦多取給於此仍係以取之於民者還之於民無如奉行既久弊竇日滋局卡繁密司巡苛暴查驗則到處留難浮費則有加無已以致商利日薄民生日艱良懦者歇業而失生計狡黠者驅之以歸洋旗徒召怨咨無裨國用體察情形大有岌岌不可終日之勢臣深憂熟計惟有改辦統捐一法商人稽留

勒索之處較少稽查弊端亦較易當經督飭司局通盤籌畫專以宏綱疎目之道行之現將內地之鮎魚套法泗洲黃陵磯湘口坪坊黃花滂縣河口天門縣黃陂縣孝感縣岐亭武安堰距長江最近之興國州沿長江之蘄州淦源口黃石港下巴河樊口北卡江口郝穴宜都縣沿襄河之漢川縣仙桃鎮岳口沙洋東津灣鄖陽府及襄陽府船釐張家灣船釐二十九局一併裁撤其應收百貨釐者酌於長江襄河及內河共留大小二十局一律改爲統捐此外若鸚鵡洲竹木捐長江埠土布捐河溶絲絹捐應城石膏捐安陸船捐各有專門不抽百

貨其河溶應城兩局向來兼抽百貨者俱行停免所有  
全省收捐章程略分三項外省客貨徵之於入境第一  
卡本省土貨徵之於由產地運出內河第一卡計其指  
運地方沿途經過幾局卡將向章應完釐數合併計算  
統於此第一卡徵收一次以後概不重徵其本省銷售  
落地之貨徵之於最大市鎮以後轉運他處除經過各  
局應補統捐外該貨行抵轉運銷售之地其落地捐概  
不重徵此三項仍照各局向章完釐之數概不加增如  
有指近運遠者及串通司巡繞漏賣放者前途查出時  
仍令將朦免之數補完并加重罰凡從前成案稟明之

掛號照票灰印三項陋規以及划子錢提船錢等一切陋規暨隨時勒索各費全行革除在商民於向來應完釐捐毫未加增而沿途查驗留難節次索擾獨除淨盡當經分飭各局遵照統捐新章於五月二十日開辦應裁各局卡卽於是日一律裁撤如有委員舞弊司巡婪贓違背新章浮收勒索藉口留難一經發覺審實卽將委員參革司巡拏辦此事便於商民而不便於向來婪索作奸之委員司事危言恫喝多方沮撓臣權其重輕力排衆議決計行之卽使目前收數稍有短絀然從此商旅寬舒民生暢遂釐捐終必日有起色斷不致遜於

從前試辦數月以來商民歡悅事機頗順以後如有斟酌損益之處再隨時奏明辦理

硃批戶部知道欽此

遵照新章改編營制餉章並設督練三處摺

光緒三十

一年十一月十一日

竊臣於上年七月間就湖北餉力人才參酌北洋營制先編兩鎮其時以練兵處章程未定經臣於摺內聲明俟練兵處奏奉諭旨後遵辦在案嗣於上年九月准練兵處會同兵部將奏定陸軍營制餉章咨行到鄂精詳緝密宏達賅通兼采東西各國之長原本兵農合一之



訓亟應欽遵辦理查湖北省控長江之上游當鐵路之要衝以後商務日闢交涉日多最爲江海亂匪注目窺伺之所在以地勢時局論之必須有精兵三四萬人方能勉強應用卽論至少之數亦非練足兩鎮不可本欲一切卽照新章編成兩鎮但以餉項萬分艱難且將領官弁之人才目前亦實不敷用茲督同司局及各營將領詳加籌度萬不得已設爲暫從節省勉支局面辦法以俟徐圖擴充擬將第一鎮按照新章第三年全數編練其第二鎮則照新章變通規制之第一年編練於兩鎮全數簡數之正兵及帶兵員弁悉照新章一無增改

而於雜項委員人夫車馬及餉數則體察情形量爲撙節減緩庶成規不改而財力稍紓一俟餉項稍可支持人才漸能敷用必當練足兩鎮其各項員弁人夫車馬數目一循新章不令纖毫參差以臻完備謹將各項辦法分條臚陳於左

一全省共設兩鎮湖北地衝事棘日日皆宜嚴防至少亦應設常備兩鎮全數之兵遇有徵調之時居守征行方可不致偏廢且兩鎮並設則將領之能否士卒之強弱無難互相比較以力求進益故先練第一鎮第三年全數第二鎮第一年簡數以後陸續添練總以練足兩

鎮爲度

二第一鎮營制第一鎮遵照新章步隊分爲兩協四標十二營四十八隊馬隊一標三營礮隊一標三營工程隊一營輜重隊一營軍樂一隊查新章每標第一第二兩營係陸路礮隊第三營係過山礮隊查練兵處新章原許因地制宜以定礮之大小湖北全省地方非山卽水車拉之礮萬不相宜現在漢廠所擬製造七生半之過山礮兼造七生半之陸路礮兩種過山礮十四倍口徑用於本地陸路礮三十倍口徑以備用於外省故此時一標三營暫行全照過山礮隊之制

三第二鎮營制第二鎮遵照新章第一年變通制略設步隊一協兩標馬隊一營礮隊一營工程輜重各一隊礮隊亦用過山礮與第一鎮用意同

四酌量暫從撙節合計全數簡數之兩鎮每年需餉甚鉅新增雜項委員人夫及車輛騾馬甚多除正兵及將校弁目悉照定章一無增改外凡有可極力設法撙節者分爲緩設兼充酌裁減人減餉減馬減乾七項其緩設者查統制官處之正軍醫官正馬醫官各一員專司全鎮人馬衛生醫藥事關戰陣中醫多未講求擬雇用外國醫生並充教員將來教成醫官分派各營應用其

各標之副軍醫官副馬醫官以及步礮工輜之軍醫長馬醫長刻均難得其人暫從緩設且醫官醫長之外各營另有醫生現擬止用醫生其有未設醫生之各營卽改醫長名額爲醫生俟鄂省軍醫學堂學成有人再行補充醫官醫長以期名實相副又查步兵工程等營各有隨營車應設之駕車兵喂養夫及礮隊各營之管馱兵喂養夫等項刻因湖北購辦騾馬車輛一時斷難全備此項兵夫擬請緩設其兼充者將才猝難多得故第一鎮以統制兼攝兩協第二鎮以協統兼護統制所有第一鎮之兩協自統領官起及所用之參軍官等員弁

護兵火夫騎馬十二項全行緩設第二鎮以協統兼護本鎮統制其統制所屬人員除正參謀等必不可缺者共計十四員名詳具清單外其餘亦均暫緩計每年兩鎮此一項所省已成鉅款其酌裁者查新章各標設教練官一員其下注云嗣後官弁出自學堂卽將此員隨時裁去茲湖北官弁多係出自學堂自能教練此員擬裁其減人者查礮隊輜重等營之馬夫目馬夫掌匠暨輜重營之查馬長此時因驟馬未全一併酌擬減用遇行軍時再各照章增補其減餉者查統制官處之正軍需正軍械官書記長司事生暨步馬礮隊各標統帶官

處之副軍需副軍械書記等官司書生司號長以及各營之軍需軍械書記等長司書生醫生並礮隊營之查馬長等擬照原薪數目酌減緣二等書記官各書記長司書生等項新章薪餉係各處一律茲擬就其事之繁簡定薪水之多寡亦可稍從節省又查新章各營隊之正兵日月餉五兩一錢副兵目四兩八錢正兵四兩五錢副兵四兩二錢蓋北洋食物昂貴兵餉必須加增而湖北則與之稍異擬於正副兵目正兵三項月各暫減銀三錢仍照向章支給第正兵與副兵餉數相同擬免其充當雜差自與副兵有別其減馬者查礮隊營馱馬

數多鄂省介在江湖須遠向口外購辦一時實來不及  
若急求全備尤恐挑選多不合格轉無實用擬卽暫  
行酌減期敷平時操練之用礮隊每營擬暫減馱馬二  
百四十匹輜重營隊應需之輜重車現擬每隊暫備三  
輛以資練習其需用之騾亦卽按數暫減各營隨營車  
駕車之騾暫行全減又各營騎馬除輜重不計外擬亦  
全數暫減統俟陸續照章購補其減乾者查新章騾馬  
兩項每匹月支乾銀四兩八錢蓋北洋芻秣素昂乾銀  
必須厚給湖北則轉運購買尙屬便易乾銀似可從省  
擬每月每匹暫減銀一兩八錢遇有徵調再行加足



五人馬餉乾數比較第一鎮照新章全鎮之數應有官弁兵夫一萬二千五百六十員名礮五十四尊車一百三十六輛騾馬二千二百十四匹月需薪公餉乾銀九萬二千五百七十八兩零六分第二鎮照新章第一年簡數應有官弁兵夫五千四百三十二員名礮十八尊車四十七輛騾馬七百四十四匹月需薪公餉乾銀三萬九千六百二十一兩六錢六分現在湖北第一鎮全軍步隊兩協馬礮隊各一標工程輜重各一營軍樂一隊共計官弁兵夫一萬二千零七十一員名礮五十四尊車十二輛騾馬一千零六十四匹月支薪餉乾銀七

萬七千一百七十三兩一錢六分常年十二箇月共支銀九十二萬六千零七十七兩九錢二分比照第三年新章共暫減人數四百八十九員名礮數同暫減車一百二十四輛騾馬一千一百五十匹薪餉乾銀月暫減一萬五千四百零四兩九錢常年減銀十八萬四千八百五十八兩八錢第二鎮照第一年簡數步隊一協馬礮隊各一營工程輜重各一隊共計官弁兵夫五千一百八十八員名礮十八尊車三輛騾馬三百三十八匹月支薪公餉乾銀三萬二千三百八十九兩五錢二分常年十二箇月共支銀三十八萬八千六百七十四兩

二錢四分比照第一年變通章制共暫減人數二百四十四員名駁數同暫減車四十四輛驟馬四百零六匹薪餉乾銀月暫減七千二百三十二兩一錢四分常年暫減銀八萬六千七百八十五兩六錢八分通計兩鎮比照新章每月暫減薪餉馬乾銀二萬二千六百三十七兩零四分常年共減銀二十七萬一千六百四十四兩四錢八分連後開衣履一條暫減銀三萬一千四百一十九兩四錢四分併計常年共減銀三十萬零三千零六十三兩九錢二分

六新增人馬數查湖北原練之常備軍第一鎮計官弁

兵夫六千四百五十六員名騾馬二百七十四匹月支  
餉乾銀四萬零九百三十四兩第二鎮計官弁兵夫六  
千四百零五員名騾馬二百七十四匹月支餉乾銀四  
萬零五百九十一兩一錢現以原練第一鎮按照新章  
第三年編練其人數應不敷五千六百十五員名以原  
練第二鎮按照第一年變通章制編改應餘人數一千  
二百十七員名再以襄防馬隊右營一營官弁兵夫一  
百五十四員名每月餉乾一千一百三十九兩五錢改  
編爲一鎮馬隊一營並以鐵路四營官弁兵夫一千二  
百七十六員名每月薪餉銀六千九百十三兩一併編

入一鎮計一二兩鎮照第三第一兩年編練除改撥歸併暨原練各數不計外則第一鎮應仍增弁兵二千九百六十八員名車十五輛騾馬八百五十四匹

七新增餉數查每月需增薪餉馬乾銀一萬九千九百八十五兩零八分常年十二箇月共應增銀二十三萬九千八百二十兩零九錢六分

八衣履查新章衣履一項係按兩鎮常年總數列入雜支額款項下每人每年約需銀十五兩四錢有奇湖北原章每人每年支衣履銀九兩六錢兩鎮共銀十三萬一千零零一兩六錢茲既改照新章且近年百物昂貴

銀數自應增加茲力從節省暫定爲每人每年衣履銀十三兩二錢俟將來物價愈昂再行酌增計通年共需衣履約銀十八萬零五百十兩衣履一項通計兩鎮比照新章通年暫減銀三萬一千四百十九兩四錢四分九雜支額款兩鎮雜支除衣履外照新章應需額款約銀二十一萬餘兩所有打靶應需之槍礮彈各價及擦槍油費營房歲修等款皆新章所未列者一併計算在內

十雜支活款雜支活款各項數難預定擬隨時體察情形比照北洋辦法酌節省支給

十一徵兵須漸次更換合格查現有名營計籍隸湖北武昌府一千四百五十三人漢陽府二千零五人黃州府一千三百零二人安陸府一百六十二人德安府八百九十七人荊州府一百二十二人襄陽府二千七百七十四人鄖陽府一千零五十人宜昌府一百一十一人施南府三十六人荊門州三人荊州駐防四百八十六人此外籍隸直隸河南山東安徽湖南者共一千九百一十六人向來每一營中籍貫不一自去年招募各營卽懸爲定式此一次指定專招何處之人惟風氣未開強健者多係魯鈍粗暴不守禮法教訓講說性閤難

記至於身家不卑素有執業資質聰穎自能寫字者多  
不願入營充兵故應募者實難如數然新募者不能照  
以上所言格式則目前教練之功收效已少將來退伍  
之後流弊尤多故按籍徵募之兵不得不尤慎其選且  
外籍訓練已久之兵亦未便驟加裁汰只可陸續更換  
歸併俟以後續募該籍之人漸多即可一律畫清府分  
將來必須辦到方爲合格庶可漸收徵兵之益

十二將領委任現派委新授四川松潘鎮總兵張彪爲  
第一鎮統制官兼攝該鎮所屬之兩協以節經費委謝  
澍泉爲步隊第一標統帶官委米文友爲第一營管帶



官委戴鈞南爲第一營管帶官委單啟鵬爲第二營管帶官委鐵忠爲第二標統帶官委邵翔宸爲第一營管帶官委任光耀爲第一營管帶官委孫國安爲第三營管帶官委李襄鄰爲第三標統帶官委楊正坤爲第一營管帶官委陳鍾麟爲第二營管帶官委張永漢爲第三營管帶官委余大鴻爲第四標統帶官委張長勝爲第一營管帶官委黃鸞鳴爲第二營管帶官委李汝魁爲第二營管帶官委龔光明爲馬隊第一標統帶官委喻化龍爲第一營管帶官委馬得才爲第二營管帶官委蕭開桂爲第三營管帶官委杜長榮爲礮隊第一標

統帶官委卓占標爲第一營管帶官委敖正邦爲第二營管帶官委王遇甲爲第三營管帶官委李克果爲工程第一營管帶官委齊寶堂爲輜重第一營管帶官委副將銜補都司後遊擊黎元洪爲第二鎮第三協統領官兼護該鎮統制官委劉溫玉爲第五標統帶官委戴壽山爲第一營管帶官委蕭先勝爲第二營管帶官委曹進爲第三營管帶官委曾廣大爲第六標統帶官委李錦標爲第一營管帶官委陳榮鍾爲第二營管帶官委樊毓英爲第三營管帶官委王祥發爲馬隊第二標第一營管帶官委張正基爲礮隊第二標第一營管帶

官委孫綬康爲工程第二營前隊隊官委郭斌爲輜重第二營前隊隊官委藍天蔚爲第一鎮正參謀官吳茂節爲第二鎮正參謀官以上標營隊各官皆係現在湖北各營充當督帶營官武學教員等差之員或入外洋學堂或入本省學堂取其曾聞講授功夫較優而兼有閱歷資格較久者委派軍職

十三督練三處委任查督練公所內分三處實爲整頓武備之源責任甚重他省多派道員充當總辦惟湖北道員中暫無素諳軍學之員而實缺司道公事過繁斷無餘暇可以專精講求徒成具文無裨實用然一省軍

旅大事亦斷不可不使實缺司道與聞茲委藩司臬司  
鹽道暫兼三處之差作爲暫行管理一俟遴選有人卽  
行另委專員總辦以責實效將來實缺司道可改充參  
議等官現擬將三處幫辦先行委定以便分投舉辦查  
幫辦本無定額茲委湖北候補知府高凌霨畢業學生  
舉人候選同知劉邦驥兩員爲兵備處幫辦湖北補用  
知府齊耀珊畢業學生生員寶瑛兩員爲參謀處幫辦  
在任候補知府本任湖北夏口廳同知馮啟鈞畢業學  
生知府銜吳元澤兩員爲教練處幫辦大約本省職官  
一員遊學畢業學生一員一取其明習本省情形一取

其曾經肄習兵事庶可相輔爲用以後卽將營務處名目裁去

以上辦法臣本諸新章參諸衆議斟酌湖北情形小有變通總期與練兵處原章馭兵之大端立法之要意不致稍有改動而稍節餉需暫作一時權宜之計一俟湖北餉力充裕人才足用臣必當陸續擴張軍備務期按照新章一無欠缺俾其均成勁旅以仰副 聖主整軍經武綏靖南服之至意

硃批練兵處議奏欽此

湖北鑄造銅元請由本省自行限制摺

光緒三十一年十一月十一

月二十  
八日

竊照光緒三十一年十一月十四日准財政處咨開光  
緒三十一年十月二十三日准軍機處片交本處會同  
戶部具奏各省鑄造銅元日益增多請酌定限制一摺  
奉旨依議欽此相應恭錄諭旨刷印原奏咨行欽遵辦  
理等因查原奏內稱現在各省銅元均已不虞缺乏非  
趕爲酌定限制未易施補救之方擬令江蘇湖北廣東  
等大省每日造數不得逾百萬直隸四川兩省每日造  
數不得逾六十萬其餘各省每日造數不得逾三十萬  
成色分兩均須遵照財政處戶部奏定章程不得稍有

歧異各省現有之廠不得沿用舊名應統名戶部造幣  
分廠冠以某省字樣以資識別至各該局所用鑄模參  
差不一前已奏定均須由戶部頒領祖模所有現用各  
種舊模一律卽行停廢擬令各省局於未頒到祖模之  
先一律暫行停鑄趕將各該省歷年鑄造銅元數目查  
明白開鑄起共鑄出若干現積若干民間需用數目約  
需若干並已經行銷州縣若干處其購定物料銅斤未  
經鑄造者尙存若干限三箇月內先行據實報知財政  
處戶部以憑考察多寡盈虛之數等語臣惟各省銅元  
增鑄日多今由財政處戶部頒發祖模限制鑄數誠爲

畫一幣制統籌全局之要政惟各省情事各殊就湖北而論近年所鑄銅元皆係發交官錢局經理聽商民備價赴局兌換從未在本省各州縣及外省各埠派員設局分售然隨鑄隨銷官錢局並無存積自本年八月二十七日准兩江督臣周馥電稱商准外務部將各省銅元仿照米穀辦法禁運出口擬自九月初一日起飭各關一律照辦等語臣當卽電復照辦一面通飭各關卡嚴行查禁本省銅元概不准運銷出境一面飭令造幣廠減鑄銅元十成之四蓋早已自行限制矣故自九月分起湖北銅元從無出境之事海關冊籍可考而知也



第湖北需用銅元情形有與各省不同者數端漢口爲通商大埠每年貿易不下數千萬各幫生意出入皆用錢盤不用銀盤故漢鎮商務需錢獨多近年制錢缺乏全賴銅元爲周轉兩年以來市面需用銅元之數迄未減少其不同者一也湖北以需餉浩繁發行制錢一千文之官錢票積年用出已數百萬張專恃銅元爲應付武漢兩處商民以官錢票赴局兌換銅元者每日約需數萬串平時隨到隨兌因應不窮故官錢票之信用與現錢無異若鑄數太少不敷兌換商民稍覺取付不靈則散在民間之官錢票必爭向官錢局兌取現錢無從

應付立有傾塌之虞於湖北財政大局所關非細此其不同者二也夫民間以票兌錢斷斷不能限制銅元鑄數既少官錢局窮於應付勢必須向市面收購銅元以資接濟彼時錢商抬價居奇不獨官錢局賠累難支且恐市面之牽動利害出入關繫尤重此其不同者三也伏念財政處戶部限制銅元之意蓋慮各省貪利多鑄本省既無銷路必將設法運銷他省而他省自鑄之銅元轉致滯銷牽累誠非事理之平今湖北銅元專銷本省絕不侵佔他省銅元銷路則酌盈劑虛本省自能時其消息斷無一味多鑄自取壅滯之虞此理亦顯而易

見核計目前民用每日僅鑄百萬斷斷不能敷用相去太覺懸遠合無仰懇天恩俯念湖北省需用銅元尙亟暫予變通准由本省自行限制隨時體察情形按實在需用之數鑄造斷不容廠員任意多造自取虧耗俟一兩年後察看市面需用銅元較少卽當遵照財政處定章辦理

硃批財政處議奏欽此

進呈擬訂鑛務章程摺

光緒三十一年十一月二十八日

竊照光緒二十八年七月欽奉上諭鑛務爲今之要政昨經劉坤一張之洞電奏采取各國鑛章詳加參酌妥

議章程等語所見甚是卽著該督等將各國辦理鑛務情形悉心采擇會同妥議章程奏明請旨務期通行無弊以保利權而昭慎重欽此嗣劉坤一因病出缺經臣遴委華洋各員購取英美德法奧比利時西班牙等國鑛章詳加譯錄於二十九年冬咨送外務部交侍郎伍廷芳參酌編輯三十年十一月由該侍郎將擬訂中國鑛章稿本郵寄來鄂綱領具備惟似覺近於簡略其所定鑛地界限不得過三十方里亦覺限制太寬復經臣交在滬之英國鑛師布盧特重加增訂書成後又復委派多員暨遊學日本法政科畢業學生等並采取日本

鑛章細心參校臣覆加酌核其中條款凡於中國情形稍有不宜者必再三研求詳審酌定冀免流弊而保利權謹纂成中國鑛務正章七十四款中國鑛務附章七十三條分訂兩冊查各國通例凡屬土地分爲地面地腹兩層民間產業止能管及地面其地腹則概爲國家所有故雖本國人民開鑛其准駁之權咸聽命於官至五金之屬及寶石等貴重鑛質更非官不得開采至他國人民斷不准承辦本國鑛務或設立公司間有外國人附股而事權仍是本國人爲主股分仍是本國人爲多日本律法尤嚴開鑛公司直不准外人附股惟中國

於未定鑛章以前已准洋商在內地開鑛此時自未便  
概加拒絕第從前所訂合同每有損礙華民生計及侵  
我主權妨我治理之處現在中國與各國議訂商約均  
有鑛務一條其文云中國政府允願招致華洋資本興  
辦鑛業凡各國人民能遵守中國所定鑛務章程者均  
准其在中國開采鑛產惟須比較諸國通行章程於鑛  
商亦不致有虧等語是此次所訂鑛務章程無論新舊  
鑛商但使於洋商不致有虧其於華民生計中國主權  
地方治理必當設法保持修改完善用資補救不宜過  
於遷就坐棄遠大無窮之利權查中國所富有者鑛地

所缺乏者資財自無妨藉資於外國富商要之必令其有利可圖而不令外人獨專其利斯爲最平最妥之方故現訂鑛章聲明各國人民必能遵守中國法律乃准其承充鑛商又洋商非與華商合股斷不准其獨自開采其合股之法則無論官地民地華商洋商業主以鑛地作股鑛商以銀作股若係丙字類之鑛其股分之數有地之業主與出銀之鑛商各占其半除用費歸鑛商自籌外餘利均分蓋大宗緊要之鑛全在丙字一類至如乙字類鑛質較賤得利較薄者地股只作全股十成之三以示區別其作股一半之辦法現有直隸臨城縣

煤礦成案可援一切可資仿辦其真正華商有資本者儘可自充銀股之礦商與業主商允合辦力不能獨任一礦者仍准其附入銀股之洋商並設立專條令洋商力加優待具詳章程之內誠以開礦一事資本甚鉅學問甚深專恃華商之微資土法之淺嘗斷無大效惟以礦地與洋商合股則業主與出資本之人分享其利最爲簡要公平然必俟除盡用費得有餘利之後以地作股者方能分潤則洋商自不致有虧竊惟中國今日定章明准外人在內地開礦比較各國通行章程已屬處處從寬加之於礦界年租礦產出井稅均予量從輕減



明示我重權輕利庶洋商均願就我範圍不撓法紀且處處皆國家與人民共享其利上等之鑛其餘利國與民各得其半中等之鑛其餘利全數推以予民此固足見聖朝寬大惠民之政超越環球諸邦亦可藉以鼓舞愚氓不致狃於積習沮撓大利果能上下相信中外相安將來地利大興窮民有養百貨日通農工商賈利益交資此乃經國久大之遠謀豈在目前區區之租稅微臣區區之意實注於此上年二月商部奏定鑛務暫行章程摺內聲明仍俟臣處輯有專書歸併辦理以免歧異等語自應參互考訂歸於畫一茲謹將擬訂中國鑛

務正章鑛務附章各一冊繕寫成帙恭呈御覽擬請敕下外務部商部詳加覆核俟核定後其正章卽作爲鑛律附章卽作爲詳細條目請旨頒行俾鑛業日興利源日濬實於國計民生均有裨益

硃批外務部商部議奏書併發欽此

改州縣賠款捐爲學堂捐留辦本地學務摺

光緒三十

一年十二月初二日

竊照賠款一項戶部行令各省攤籌湖北省派至一百二十萬兩臣當時會同前撫臣督同司道各府廳州縣籌議傳集紳董分認足數雖各屬辦法不同大率出於

丁漕串票等項或兼資稅契或取給鋪捐計攤歸各屬  
州縣征解者約共銀六十萬兩羣知此款關係中國安  
危大局不敢不强忍遵從頻年以來勉力輸將民情極  
爲困苦漸有力不能支之勢自上年臣回任後正值明  
詔興學頒定學章亟應於各州縣徧設高等初等小學  
堂以普教育而各屬紳民咸以籌繳賠款捐已屬萬分  
竭蹶更無餘力再籌興學之資臣以興學爲當今急務  
不容須臾或緩此項賠款捐責諸民間本多勉強若將  
此款改留各州縣興辦學堂則以本地之財興本地之  
學父兄出資以培其子弟子弟力學以答其父兄一轉

移間名正言順當足以化怨咨爲絃誦因與司道籌商定議另就本省土膏捐籤捐銅幣盈餘等項酌量加提湊足每年賠款應解之數依時解足不誤償期而各州縣之賠款捐均改爲學堂捐經於三十年八月起札行各廳州縣令將賠款捐全數免解留充本地辦理學堂之用名曰賠款改學堂捐令各廳州縣照原派之額另款收儲與本地端正紳士公同辦理專備各種學堂之需不准挪作他項公用因改辦之初民力能否支持民情是否允洽未敢遽定現已試辦一年民間知所納之款卽爲培植本地人材之用尙能遵章完繳自應奏明

立案自有此項學堂捐經費有著各廳州縣均能遵照  
奏定學堂章程將高等初等小學及師範傳習所爭先  
舉辦並選派學生資送省城及日本學習師範專科以  
備各小學堂教員之用一洗從前觀望遷延之習此後  
漸次擴充必當使民智日開人材蔚起以仰副朝廷興  
學培材之至意

硃批戶部知道欽此

收回粵漢鐵路瀝陳辦理情形摺

并清單  
光緒三十一年十二月

月二十  
七日

竊臣於上年二月間訪聞承辦粵漢鐵路之美國合興

公司並未知會中國私將公司底股三分之二售與比  
國公司董事亦大半易置比人查比與法通法又與俄  
合京漢鐵路已由比法兩國合辦若粵漢鐵路再入其  
手則中國南北幹路地權全歸比法等國掌握之中與  
俄人所造東三省鐵路鉤連一氣既扼我之吭背復貫  
我之心腹而借款本息太鉅年期過久限滿後斷無贖  
回之望其爲中國大患殆有不忍言者臣探詢旣確焦  
灼萬分立即電致湘省官紳並電致督辦鐵路總公司  
大臣盛宣懷痛言利害竭力爭持以合興無端違背合  
同亟應據理責言廢棄前約自臣倡此議後鄂湘粵三

省紳民漸次傳播始知有粵漢路約不善之說議論推  
敲羣思補救無如合興公司既異常狡執美國富商復  
道合興之黨柏士來華運動自稱係華豐公司願借給  
中國鉅資助我與合興廢約而另訂合同將此路歸其  
承辦其實華豐無異合興然而術詭言甘於是被其煽  
惑者忽倡以美接美之說衆議紛紜大爲所動臣以合  
興公司違約失信覆轍在前若仍聽以美接美是直以  
移花接木之計愚弄中國一切權利仍落他人之手中  
國絲毫不能收回與所以籌議廢約之意自相矛盾遂  
電滬力阻其議柏士因親至京師介其公使向外務部

要求外務部函令來鄂就臣商辦其駐漢美領事復多方爲之游說臣面告以此約必廢無可商議柏士到滬後復三次來函攬辦路款均經臣嚴詞峻拒堅不允行由是袒美者咸嗒然失望而怨謗紛來阻撓百出籌議廢約之事益形棘手矣迨上年十一月初三日臣承准軍機大臣字寄光緒三十年十月二十一日奉上諭御史黃昌年請挽回路政一摺粵漢鐵路關係緊要現在合興公司正議廢約應卽另籌接辦著張之洞悉心核議妥籌辦理以挽利權原摺著鈔給閱看將此諭令知之欽此臣自奉明旨責有專歸乃益抱定宗旨不敢爲



異說所搖然爲難之處不一其端臣初意以盛宣懷爲與合興公司訂約原議之人繫鈴解鈴貴資一手故開誠布公往復電商深冀其相助爲理不意籌商累月盛宣懷因宿疾纏綿困卧不能辦事正當喫緊之際臣去電兼旬杳不得復偶有病間答復而精神未能貫注終不得此事要領此時盛宣懷病勢甚劇屢瀕危殆無怪其然而湘中官紳之派赴上海者一則主張訂借美款幾爲柏士所愚一則徑自聘用律師直令赴美與合興涉訟經臣飛電力阻追回其事乃已羣議紛歧輕舉妄動幾誤大局此其爲難者一也臣以事機危迫稍縱卽

逝不得已始徑電出使美國大臣梁誠密商辦法該大臣復稱中國廢約之說喧騰報紙美公司已豫爲之地由彼富商摩根將比國股票重價收回一千二百分以爲事權仍在美人之手卽與合同不倍不能再言廢約美政府極力袒護屢飭其駐京使臣柔克義向外務部干涉聲言美政府斷不允廢此約合與總辦惠惕爾因出使大臣梁誠持正力爭辯詰甚緊遂擬撇開梁誠自行來滬設法把持此事經臣聞知切電上海總公司轉告惠惕爾彼卽來華無論改何辦法臣斷不承認囑其飛電阻回此其爲難者二也臣往復與駐美使臣梁誠

電商直言廢約或致有礙國家交涉改爲贖約則僅係商務往來事出和平彼政府自無從干涉該大臣因就此意與合興公司反覆磋商彼延前美國兵部大臣路提前美國按察司英格瀾爲主謀梁誠乃延聘前美國外部大臣福士達鐵路專門律師良信等與之抗議路提等以美國國體東方商務種種關礙爲詞語意堅決福士達等再三辨詰始認原定合同之疎漏合興辦事之含混允聽中國政府修改合同收回權柄由美國政府擔保永不轉替而贖約則堅不允許經出使大臣梁誠痛切開導力陳三省之輿情中朝之意旨微臣之定

見大局之利害路提等甫允開議售讓辦法而合興索價浮冒初開七百萬金元繼又索公司酬勞二十五萬金元借票餘利四十餘萬金元利息在外經與駁減彼卽以股東未曾議定經月遷延不允遽決比主復遣其親信至紐約極力阻止事幾中變此其爲難者三也迨後議定贖路全價六百七十五萬金元另給利息甫將草約彼此簽字而比政府竟電美外部强行干涉比主復面晤摩根唆使悔議並介美總統之友美國上議紳比洛遲轉告美總統力翻此案美總統適接其駐華使臣柔克義電誤會我政府無意廢約且疑臣與出使美

國大臣梁誠均非我政府授權經理之人遂欲挑剔廢約兩字借端以廢草約危機頓逼幾幾功敗垂成臣於七月十三日電奏內已詳晰陳明此其爲難者四也幸荷聖明昭鑒俯准施行外務部亦悉力主持一再照會美使聲明臣與梁誠實有辦理此事之權美總統尙知慎重邦交轉圜允許其事乃定而鄂湘粵三省紳民驟欲籌此六七百萬金元約合華銀千餘萬兩斷斷無此力量假使款不應手非但立誤事機抑且貽羞中外此其爲難者五也臣自奉旨籌議粵漢路事卽屢次分電湘粵官紳公議切實籌款之法嗣准兩廣督臣岑春煊

十二月十一日來電云此事必須備有贖路的款方能  
爭論而粵紳渙散倡議者無錢有錢者不管紳力斷不  
足恃官力則艱窘已極更無擔任如此大宗之力且果  
使廢約立須鉅款應付卽有別項籌款之策亦緩不濟  
急愚以爲宜由鄂湘粵三省合借洋款若干萬分年勻  
攤認還此款借成約廢卽以贖路不廢立時付還虛糜  
利息亦尙有限等語而湘紳函電亦無立籌鉅款之策  
臣體察湘鄂粵三省情形旣屬相同不得已始定借款  
之議一面電商湖南撫臣轉詢湘省各紳湖南撫臣復  
電云與諸紳熟商均應遵辦徧加詢訪惟英領事所開

利息較輕借款交付實鑄不須折扣惟於粵省別有要索利益之事臣婉辭推謝致借款之議久懸不定迨本年八月初二日猝然接到出使美國大臣梁誠電合興股東已將草約批准第一期款美金二百九萬八百六元零應於西九月七號卽八月初九日在紐約交兌計期已近務請合三省全力迅卽籌足於西九月七號以前電滙到美免致變局等語臣電致梁誠懇其展期十日以便趕籌覆電云第一期款商緩十日福士達謂前遵尊電將贖款備齊悔約索償各節警告摩根正約六號簽押與否視此期交款爲從違若再生變萬無挽回

務祈如期電滙等語蓋合興之意料知中國貧窘斷不能於旬日間猝籌數百萬巨款故其總股東於草約定後已將三箇月多方推宕延不批准此事成否未定以致籌不能籌借不敢借直至屆期前七日始電告中國批准立索交款若款不能集則此約全翻轉將譏我無款自誤此謀至狡至毒蔑以加矣其時英領事先期赴廬山避暑臣逆料急而相求要求必甚且議訂合同亦需兼旬以外而應付合興之款若愆期一日全局俱翻當此之時既不能乞緩於外洋復不能求助於他省以關繫中國南疆全局之大舉特旨飭辦之要政議論兩



年全球皆知若徒以無款之故竟致不能收回自棄草約不惟利權永棄而且將令各國譏笑中國辦事者皆空言無實之人以後一切邦交種種窒礙此七日之中臣憂煎萬狀繞室傍徨此事結局如何竟不敢預料此其爲難者六也幸湖北官錢局信義素著尙爲各國銀行所信臣召集司道剴切籌商均以大局利害所關同心擔任立即一面飭官錢局設法擔保先向滙豐銀行息借銀三百萬兩官錢局湊集銀二十餘萬兩竟如期電滙已到美國實非臣意料所及當即將贖路正合同電由軍機大臣代奏請旨畫押欽奉俞允一面電招英

領事回漢商訂借約英領事見臣處第一期付款已能暫行自借應付而贖路事關繫大局亦願助成盛舉於是前所要求者不再提及合同條款悉照光緒二十六年八月湖北因保護長江籌備餉需向滙豐銀行息借五十萬兩成案辦理業經將合同咨明外務部在案此項借款於鐵路權利固絲毫未嘗有所假借也借款既定應付合興第二期款遂於中厯九月十二日全數交清合興卽於是日分電滬粵兩處公司洋人將在滬存儲之圖表冊籍在粵已修之鐵路及機車房棧一切備用材料悉數點交中國委員接收經臣派員分別接收

清楚查此次合興所訂售路合同載明中國政府可將合興公司在中國所有產業已成鐵路材料測量圖表開鑛特權以及在中國所有權利無論明指暗包一概全行收管等語玩開鑛特權及明指暗包之言可見從前所失權利之大實無窮盡今幸得全數贖回從此永斷葛藤消弭鉅患此皆仰賴朝廷威德暨樞部諸臣同心匡助三省紳民協力圖維出使大臣梁誠才識兼優忠實爲國規畫辯論妙協機宜故此事克底於成現已議定修路之款由三省官紳合力籌集決不再借洋款惟款由本省紳民集股止能各籌各款各修各路大綱

必歸畫一而辦法不能盡同與他處鐵路之借款興辦者迥不相侔紳民辦事全賴地方官相助爲理似須責成本省督撫督飭司道及地方官吏暨紳士商民因地制宜設法籌辦庶情形不致隔膜工程亦免延擱是否有當伏候聖裁茲准出使美國大臣梁誠將合興公司所訂售讓合同暨收回未售金元小票已付息票並派員在粵在滬接收各件先後郵寄冊報到臣謹繕具清單會同署兩廣督臣岑春煊湖南撫臣龐鴻書合詞恭摺具陳伏祈聖鑒奉

硃批外務部商部知道單併發欽此

謹將美國合興公司議訂售路合同所譯漢文照繕清  
單恭呈御覽

一千九百五年八月二十九日

湖南湖北廣東三省代表人湖廣總督  
出使美墨秘古國大臣梁

代表 大清帝國政府爲本合同第一位美國紐遮些  
省合興公司爲本合同第二位訂定合同事因一千八  
百九十八年四月十四日在美國華盛頓都城所訂正  
合同及一千九百年七月十三日所修續合同本合同  
第二位經蒙授權在 大清帝國建築鐵路由漢口城  
起至廣州城止並得有管理此路之權又因一千九百  
五年六月七日以前 大清帝國政府將前兩項合同

或特權注銷聲明各該項合同所指鐵路決定自辦並  
按例將注銷決定各節知照本合同第二位同時大  
清帝國政府願給本合同第二位以公道償費將上開  
各項合同注銷又因本合同兩位議定第一位允給第  
二位注銷合同償費數目計美金六百七十五萬元經  
將辦法訂立草約聲敘如下

大清帝國政府與美國合興公司訂定草約

茲因中國政府將建築粵漢鐵路之特權及合同注銷  
作廢又不准合興續辦路工惟情願給以公道償費此  
項償費訂定總數計美金六百七十五萬元中國政府

可將合興在中國所有產業已成鐵路鐵路材料測量圖表開鑛特權以及在中國所有應得權利無論明指暗包一概全行收管所有合興已提之中國政府借票除已售之二百二十二萬二千元外一概交還中國政府查收至此項已售之二百二十二萬二千元或交還或收存仍聽買主自便如買主願意收存或全數或少數每百元應按九十元計由總數六百七十五萬元之內扣抵惟不論如何辦法此項二百二十二萬二千元借票在西一千九百五年五月一號應付息銀五萬五千五百五十元中國政府須自本日起於三箇月內照

數付給又總數六百七十五萬元內中國政府須自本日起於三箇月內先交二百萬元所餘之數須自本日起限六箇月內一律清付合與照收所有交款訂明由中國政府妥速籌辦中國政府每次所交之款須自一千九百五年五月一號起至交款日止按年息五元計加付利息以上辦法應由中國政府及合興股東彼此批准方作定議一千九百五年六月七號福士達路提英格濶簽押

又因本合同第二位之股東於一千九百五年八月二十九日會議將上開草約按例批准並經本合同第二



位之股東多數及董事員等准照將上開草約實行本  
合同第二位之執事人員得議定所有實行此約應須  
之合同又因欽奉大清國 大皇帝諭旨將上開草約  
按例批准並派湖廣總督張之洞出使大臣梁誠實行  
原約是以本合同兩位議定如下

本合同第一位允給第二位美金六百七十五萬元並  
由一千九百五年五月一日起計至按期或分期交款  
之日止按年息五元加給利息按照下開辦法於一千  
九百五年九月七日或此日以前應交二百萬元及所  
餘之數於一千九百五年十二月七日或此日以前均

由本合同第一位在紐約城用美國金元交給第二位收受並無折扣俟第一位將此款美金六百七十五萬元及其利息交付第二位收受清楚第二位即將所有因前項各合同特權或因注銷該項各合同之故可向大清帝國政府索取各事概行解放並按照上開辦法第二位又將合興公司在中國之產業已成之鐵路材料圖表鑛利諸特權以及合興公司所有在中國無論明指暗包之產業均一概交還第一位收執本合同兩位均願 大清帝國政府將第一位按前項各合同在中國應得產業一概接管惟彼此聲明非將末次款項

交付所有現情仍然不改而第二位之名分及利益亦不因此合同而有改變彼此又聲明本合同第二位由本日起四十日內將已經售出之 大清帝國政府借票二百二十二萬二千元或留存或繳還第一位之處知照本合同第一位如此項借票業主或業主等不如期將所定辦法知照第二位即作爲該業主或該業主等願意留存借票第一位可將留存之票每元按九折在末次付款內扣抵本合同第一位允付已售借票自一千九百五年五月一日及九月七日或此日以前應付利息並允凡借票業主留存之借票本息到期即行

交付又彼此訂明一千九百五年六月七日所訂草約  
概經兩位認實批准一概按約實行於上開年月日本  
合同第一位由湖廣總督張之洞出使大臣梁誠欽奉  
諭旨將此合同錄副簽押本合同第二位由該公司總  
辦及書記將此合同錄副簽押並將該公司印信蓋用  
以昭信守

湖南湖北廣東代表人湖廣總督張之洞押

梁代

出使大臣梁誠押

合興公司總辦惠惕爾押

書記谷德押

見證人英格瀾押

福士達押

謹將出使美國大臣梁誠在美國及湖北派員在上海  
廣東分別接收合興公司交還粵漢鐵路一切財產物  
料圖表契券冊籍開列簡明清單恭呈御覽

計出使大臣梁誠在美國收回合興公司點交各件  
一收金元小票七箱計共四萬五百五十六張面值美  
金三千七百七十七萬八千元

一收息票計共四千四百四十四張

一收勘路定路探水鑽地造房各種圖橋梁溝渠車站

車輛鋼軌鐵廠煤礦各種圖又草圖總圖形勢圖工程圖報告圖並各項估單計共一百一十九件

計湖北派員在廣東收回合興公司點交各件

一收自石圍塘至佛山雙軌鐵路三十五里零六四

一收自佛山至三水單軌鐵路六十四里零六八

凡附屬鐵路之橋梁馬頭站屋車廠貨棧機器車輛剝船等項及各站未估價之存料一律接收清楚

一收鐵路各項圖表三千一百六十三張

一收鐵路地契二千四百一十五張

一收購地領狀八十四張共計地價銀十二萬三千五

百九兩

計湖北派員在上海收回合興公司點交各件

一收總公司正契四千六百八十五張

一收領狀一千七百七十八張

一收文卷二十八宗

一收豁免丁漕清冊六本

一收上海廣東及美國用款並行車等報銷譯冊三十

本

一收散圖及估單三十四張

一收廣東購地局解送副契副領狀關防文卷帳冊及

購地散圖計共三箱原解清冊二本

一收管理處副本圖樣估單共三百十餘張洋文帳據  
並各項冊簿共一百六十六包

一收紙件共十八箱車脚廢票共五箱

一收器具共二百二十餘件

一收銅船股分票一張



張文襄公全集卷六十五終

新城王樹森校